



Udruženje za jezik i kulturu Lingvisti

ONLINE LJETNA ŠKOLA BHS JEZIKA

"ČITAM I PRIČAM"

KULTURNI PROGRAM
"MISLIMO O PRIRODI"

19 - 30. juli 2021.

Uvod

Mislimo o prirodi

Bilo da već govorite naš jezik ili ga tek učite; da imate s kim svaki dan govoriti ili nemate baš prilika, da učite bosanski ili hrvatski ili srpski ili crnogorski ili vam tu ništa nije jasno – pridružite nam se na dvije sedmice ljetne škole i posvetite se sebi. I prirodi. 30 sati nastave i 12 sati kulturnog programa bit će dovoljno da se upoznamo, družimo, vrijedno učimo i malo igramo. Na predavanjima, radionicama i online turi poslije časova (na engleskom jeziku) razgovaramo o ljepotama bosanskohercegovačkih planina i voda i problemima u društvu da se ovi prirodni resursi očuvaju. Soundtrack ove godine definitivno je Duni vjetre malo sa Neretve u izvedbi Divanhane. Morate poslušati i pogledati.

Časovi

I ovo ljeto družimo se online, putem Zooma. Spajamo Istok i Zapad, Sjever i Jug. U grupama do osam osoba imamo jedan čas konverzacije s jednom profesoricom, polusatnu pauzu, pa onda drugi čas gramatike s drugom profesoricom. Dvije profesorice znači dva metodička pristupa i dva različita izgovora. Svaki čas pričamo zajedno ili u parovima; čitamo članke iz novina ili reklame; pišemo kratke priče ili pisma. A, zavisno od raspoloženja, možemo i zapjevati.

Ako nikako ne znate naš jezik ili znate samo osnove, pridružiti ćete nam se **na nivou A1 ili A2**. Prvih dana učimo slova latinice i ćirilice i glasove. Odgovaramo na pitanje šta znače slova na registarskim tablicama u BiH i kako po tablama pored puta znati nalazite li se u Federaciji ili u Republici Srpskoj. Na kraju kursa moći ćete pričati o sebi i svojoj porodici, naručiti kafu ili čaj u kafiću i burek ili sirnicu u buregdžinici. Znat ćete koje komšije pozdraviti sa kako si, a koje sa kako ste. Na časovima koristimo engleski kada moramo: da provjerimo jeste li razumjeli uputu ili riječ, da objasnimo neki kulturni aspekt ili ponovimo gramatičku lekciju.

Ako ste već učili naš jezik i znate osnove, družiti ćemo se **na nivou B1**. Pričati ćemo o stvarima u kojima uživate. Tražiti odgovore na pitanje po čemu je poznato Sarajevo, a po čemu vaš grad. Zašto na cigaretama tri puta piše da pušenje ubija? Odakle piramide u Visokom? Šta je eko, a šta etno selo? Čega ste se igrali kad ste bili djeca? Šta vam se sviđa u Sarajevu? Pisat ćemo sebi pismo u budućnosti. I truditi ćemo se da nikako ne koristimo engleski.

Na nivou **B2 i C1** i dalje ćemo govoriti o prirodi i društvu, ali i o politici: o ljudima u pokretu, o rodnoj ravnopravnosti, spomenicima i kulturi sjećanja, reklamama i konzumerizmu, o stereotipima i muzici koja se protiv njih bori. U futuru II, perfektivnom i imperfektivnom vidu, u superlativima, s pravim redom klitika. Jasno. I bez engleskog jezika. I bez njemačkog.

Ako ne znate na koji nivo trebate ići, prije početka kursa uradit ćete **ulazni test**.

Časove smo prilagodili vremenskim zonama. Na prijavi obavezno naglasite odgovara li vam više prva smjena, **od 10:00 do 13:30 CET**, ili možda druga smjena **od 14:30 do 18:00 CET**. Svjesni smo da to i dalje znači da će neki od vas morati ustajati rano ili ostajati dokasno.

Drugi dan Ljetne škole, 20. jula je Bajram. Časove koje bismo trebali imati ovaj dan održat ćemo **u subotu, 24. jula**. Svi oni koji ne slave Bajram i nemaju kod koga na baklavu, mogu nam se u utorak pridružiti **na online turi** gdje se upoznajemo s ljepotama prirode Bosne i Hercegovine.

Posljednji dan intenzivnog kursa, polaznici i polaznice će pokazati svoje stečeno znanje kroz prezentaciju, recitaciju ili nešto treće! Po završetku kursa, svi koji su redovno prisustvovali časovima dobijaju **certifikat o učešću**.

Cijena Ljetne škole je 500 KM (255 EUR). U cijenu je uključen udžbenik za određeni nivo.

Vaše nastavnice



Sandra Zlotrg

Završila Filozofski fakultet u Sarajevu: bosanski, hrvatski, srpski jezik i književnost naroda BiH i komparativnu književnost. Magistrirala na istom fakultetu na temu rod i žargon. Radi kao lektorica i kao profesorica BHS jezika kao drugog/stranog. Zanima je feministička lingvistika i uživa u objašnjavanju kako gramatička pravila imaju smisla.

Ifeta Palić Kupus

Završila je master studij bosanskog, hrvatskoga i srpskog jezika i književnosti naroda BiH na Filozofskom fakultetu u Sarajevu. BHS kao drugi/strani predaje od 2013. godine. Voli pričati i raspravljati o jeziku.




Nedžma Botonjić

Studentica master studija na Odsjeku za bosanski, hrvatski, srpski jezik i književnost naroda BiH na Filozofskom fakultetu u Sarajevu. Voli jezike i upoznavanje s novim ljudima i kulturama, zbog čega joj je predavanje jezika strancima idealna kombinacija.

Jasenska Kapetanović

Magistrirala na Filozofskom fakultetu u Sarajevu, na Odsjeku za engleski jezik i književnost. Radi kao profesorica i prevoditeljica. Voli čitati i putovati, pronalaziti zanimljivu muziku iz različitih kultura i raspravljati o svemu i svačemu.



KULTURNI PROGRAM

Ponedjeljak, 19. juli

UPOZNAVANJE

Ne marimo mnogo za formalnosti, zato očekujte opuštenu atmosferu i dovoljno vremena da upoznate ostale polaznike i polaznice, kao i nastavnice. Iako nećemo imati priliku biti u istoj prostoriji s vama, obećavamo mnogo virtualne zabave i smijeha.

Utorak, 20. juli

ONLINE TURA - Više informacija uskoro



Srijeda, 21. juli

TARIK MOĆEVIĆ, projektni službenik u CPCD-u

Tarik Moćević je magistar politologije koji se u dosadašnjem profesionalnom angažmanu uglavnom bavio novinarstvom, te analitičkim, istraživačkim i organizacionim poslom u civilnom sektoru. Trenutno je zaposlen kao projektni službenik u Centru za promociju civilnog društva na projektu „Misli o prirodi!“ koji za cilj ima jačanje lokalnih organizacija civilnog društva u oblasti zaštite okoliša, gdje blisko sarađuje i pomaže rad organizacija civilnog društva u BiH.

TEMA: Projekat „Misli o prirodi!“

Projekat „Misli o prirodi!“, koji finansira Švedska, a provodi Centar za promociju civilnog društva, pokrenut je u septembru 2019. godine sa ciljem jačanja lokalnih bosanskohercegovačkih organizacija civilnog društva te uopšte uloge civilnog društva u oblasti zaštite okoliša. Nakon malo više od polovine planiranog projekta ostvarili smo rezultate na koje smo zaista ponosni – podržali smo 41 projekat i ukupno 69 lokalnih organizacija civilnog društva, te smo dali podršku 37 javnih osnovnih i srednjih škola koje provode mehanizam za dobijanje sertifikata Eko škola. Iza svih ovih brojki stoje konkretni rezultati – nebrojeno akcija čišćenja, postignuti dogovori sa javnim i privatnim kompanijama o okolišno odgovornijem poslovanju poput smanjenja upotrebe jednokratne plastike, uključenje lokalne zajednice poput škola i vrtića u aktivnosti zaštite okoliša, vidljivo povećanje medijskih sadržaja o zaštiti okoliša. Razgovarat ćemo o svemu ovome, o okolišnim problemima sa kojima se Bosna i Hercegovina susreće i koje su glavne prepreke za njihovo rješavanje.

KULTURNI PROGRAM



Četvrtak, 22. juli

MARIJANA KANDIĆ, aktivistica i osnivačica platforme BeeEcho

Marijana je diplomirala engleski jezik i književnost. Radi kao službenica za komunikacije i kulturu u IT kompaniji Softhouse Balkans. Gaji strast prema svemu što je vezano za prirodu, a posebno prema planinama. Zbog svoje strasti prema očuvanju okoliša, te primijetivši ogromne količine smeća i plastike tokom svojih pješčenja, prije dvije godine osnovala je BeeEcho, platformu na društvenim medijima gdje dijeli svoja iskustva, jednostavne savjete i trikove, te najbolje prakse kako bi inspirisala druge da više vode računa o smanjenju otpada, održivom životu, osviještenom konzumerizmu i očuvanju okoliša.

TEMA: Koncept života s manje otpada

Dosta vam je suvišne plastične ambalaže i svih onih plastičnih vrećica za jednokratnu upotrebu? Nezadovoljni ste hranom koju neprestano bacate jer ste kupili previše? Shvatili ste da imate previše stvari u kuhinji ili ormaru? Interesuje vas kako smanjiti proizvodnju otpada, očuvati zdravlje, uštediti novac i iskoristiti svoju kreativnost? Međunarodni pokret pod nazivom „Juli bez plastike“ savršen je datum za držanje radionice o konceptu života s manje otpada. Na radionici ćemo razgovarati o malim, održivim promjenama koje se lako mogu uklopiti u svačiju svakodnevnicu i doprinijeti našem zdravlju, uštediti nam novac i učiniti da značajno smanjimo otpad koji proizvodimo. Ovo je prilika za nova saznanja, praktične primjere i razmjenu mišljenja. Ubiti dvije muhe jednim udarcem, tj. radionicom, zvuči dobro, zar ne?



Petak, 23. juli

ANES OSMIĆ, autor i scenarista serije Podrugljivci

Anes Osmić je autor i scenarista serija. Pored toga radi kao asistent na Odsjeku za književnosti naroda BiH Filozofskog fakulteta Univerziteta u Sarajevu te uređuje i vodi omladinski magazin Karike.

TEMA: Serija Podrugljivci

Podrugljivci je prva bh. web igrana serija za mlade koja kroz mnogo humora i ironije govori o iskustvu druge generacije poslije rata. Prati priču četvero mladih koji se sreću na umjetničkom kampusu izgradnje mira i napokon odlučuju jedni sa drugima progovoriti o stvarima koje ih najviše bole - o tome kako je rat i ratno naslijeđe oblikovao njih, njihove živote, kao i porodice iz kojih dolaze. Na radionici ćemo gledati seriju i između epizoda razgovarati sa autorom.

KULTURNI PROGRAM



Ponedjeljak, 26. juli

IRHAD SULJIĆ, freelance novinar i planinarski vodič

Irhad Suljić je freelance novinar i planinarski vodič. Učestvuje u organizaciji trail trke Vučko Trail, trenira i trči trail trke, te rado učestvuje u projektima u socijalnom i ekološkom aspektu, u individualnom ili institucionalnom angažmanu. Irhad je veliki obožavatelj tinskog rada i iskustveno zna da se promjenom perspektive razmišljanja, učenjem novih stvari i zajedničkim angažmanom može bilo šta promijeniti u vlastitoj okolini i širem društvu.

Tema: Zaštićena područja Bosne i Hercegovine

Nekoliko teza za radionicu:

- Razlika između zaštite životne sredine i ekologije;
- Kategorizacija zaštićenih područja u Bosni i Hercegovini i njihovi interni i vanjski izazovi;
- Upravljanje otpadom i reciklaža.



Utorak, 27. juli

ALMA MIDŽIĆ, istraživačica i koordinatorica u Udruženju Crvena

Alma Midžić je završila političke nauke, a potom magistrirala na temu „Društveni pokreti i borba za zajednička dobra: slučaj Hrvatske“. Trenutno završava master rad na temu „Vodosnabdijevanje u tranziciji“. Radi u Asocijaciji Crvena kao istraživačica, organizatorica, edukatorica i koordinatorica. Objavljuje članke, eseje, komentare u zbornicima, časopisima i digitalnim izdanjima na teme zajedničkih dobara, društvene kontrole resursa, mehanizama direktne demokratije, ali i praktične vodiče s ciljem podrške lokalnom organiziranju i političkim kampanjama. Aktivno sudjeluje u borbama protiv raznih oblika eksploatacije prirodnih resursa u Bosni i Hercegovini.

TEMA: Voda kao zajedničko dobro – vizija za budućnost

Bosna i Hercegovina ima zavidne rezerve pitke vode i netaknute rijeke koje su žarišne tačke bioraznolikosti. Međutim, čak oko 50% stanovništva nije priključeno na javni sistem vodosnabdijevanja. Manje zajednice su često prepuštene same sebi da obezbijede vodosnabdijevanje. Većina tih zajednica se upravo nalazi pored rijeka na kojima je planirana gradnja preko 300 projekata na 244 rijeke, a to praktično znači da bi na svakih 15 kilometara rijeke postojala jedna brana. Na ovoj radionici ćemo pokušati dati uvid u samo značenje koncepta zajedničkih dobara, njegovih praksi, te pokazati primjere lokalnih borbi za očuvanje zajedničkih dobara i pokušati dočarati slikovite predjele i ljude koji se bore za našu bolju budućnost.

KULTURNI PROGRAM



Srijeda, 28. juli

LEJLA KUSTURICA, aktivistica i izvršna direktorica Fondacije Atelje za društvene promjene

Kao dugogodišnja aktivistica, Lejla vjeruje u solidarnost, ljudski potencijal, aktivne lokalne zajednice, zajedničke inicijative i dobro u ljudima. Lejla neumorno radi za dobrobit, ima jake principe i neprestano nastoji učiniti više. U prošlosti je radila kao menadžerica za filantropiju u velikoj fondaciji i kao menadžerica za ekonomska i ženska prava u Srebrenici. Lejla je pokrenula inicijativu „Moja kosa, tvoja kosa“ kako bi podigla svijest i pomogla djeci oboljeloj od raka. Također je suosnivačica fondacije za umjetnost koja održava izložbe u stambenim i javnim prostorima koja su ukaljana ratom i poratnom zapuštenošću.

TEMA: Pusti vodu da teče

Prezentacija će obuhvatiti teme kao što su razvoj zajednice, aktivizam na lokalnom nivou i zaštita prirodnih resursa, s fokusom na rijeke i pokret protiv izgradnje malih hidroelektrana. Učesnici/ce će također dobiti uvid u kampanju #jaBiHdatecem. Na kraju ćemo razgovarati o tome kuda idemo kao društvo.



Četvrtak, 29. juli

DŽENETA HODŽIĆ, istraživačica i doktorantica

Dženeta Hodžić je istraživačica na Institutu za socijalno-ekološka istraživanja (ISOE) i doktorantica na Institutu za evropsku etnologiju/kulturnu antropologiju na Goethe univerzitetu u Frankfurtu na Majni. U okviru interdisciplinarne i transdisciplinarne mlađe istraživačke grupe, bavi se regulacijom podzemnih voda u povezanim socijalno-ekološkim sistemima na velikoj udaljenosti, a etnografski proučava socijalne dimenzije podzemnih voda kao i prakse korištenja i upravljanja podzemnim vodama u Bosni i Hercegovini i Hrvatskoj.

TEMA: Stvari o kojima trebate brinuti: Infrastruktura podzemnih voda i zagađenje

Kao resurs, podzemne vode su pod rastućim pritiskom uticaja klimatskih promjena kao što su sve veće suše i dezertifikacija, ali i pod uticajem zagađenja kao posljedice rada industrija, poljoprivrede, neobrađenog otpada i otpadnih voda. Međutim, podzemne vode su i dalje ključni resurs, posebno za vodu za piće i navodnjavanje za proizvodnju hrane. Na ovoj radionici ćemo se osvrnuti na trenutne izazove u upravljanju podzemnim vodama i ponuditi neke uvide u Dženetino kontinuirano doktorsko istraživanje o tome kako se ljudi organiziraju i kako konceptualiziraju ono što se često naziva „nevidljivim resursom“, uzimajući za primjer dva terenska istraživanja.

KULTURNI PROGRAM

Petak, 30. juli

OPROŠTAJ

Poslušat ćemo i pogledati vaše prezentacije na BHS jeziku i proslaviti još jednu uspješnu (naravno!) Ljetnu školu. Iako smo navikli na oproštaje uz tortu i druženje u našim prostorijama, i ovaj put će to biti ispred ekrana. Napravite sebi kafu, kolač ili neku drugu omiljenu poslasticu i uživajte! Nema derneka bez dobre pjesme. Zapjevajmo: Duni vjetre malo sa Neretve, pa rastjeraj maglu po Mostaru...

LJETNA ŠKOLA U BROJEVIMA

Grupe do 8 polaznika i polaznica

5 nivoa (A1 do C1)

2 profesorice

10 dana časova

2 časa po 90 minuta svaki dan

Ukupno 30 sati nastave

Zadovoljstvo naučenim – neprocjenjivo



Udruženje za jezik i kulturu Lingvisti
www.lingvisti.ba